



Bendt B. Kristiansen, Inuit Ataqtigiit

Kollegiet pillugit § 37 naapertorlugu apequtigineqartut akineqarnerat

30-01-2018
Suliap normua. 2018 - 1838
Allakkat nr. 7088425

Asasara Bendt B. Kristiansen.

Postboks 1029
3900 Nuuk
Oqarasuaat: +299 34 50 00
Fax.: +299 32 20 73
Email: ikiin@nanoq.gl
www.nanoq.gl

Inatsisartut suleriaasiat naapertorlugu apequtinnut qujanaq. Apequtigineqartut tullinnguuttuni akissuteqarfigissavakka.

Apeqqu 1: Kalaallit DK-mi ilinniartut qassiuppat?

Akissut: Ullumikkut DK-mi ilinniartut 492-iusutut nalunaarsorneqarsimapput, imatut agguagaallutik:

Ilinniagaqarnissamut piareersarneq	91
Inuussutissarsiutinut ilinniagaqarneq	61
Ingerlaqqiffiusut	340

Apeqqu 2: Kalaallit DK-mi ilinniartut kollegiessaaleqisut qassiuppat?

- Ilinniartoqarfiusuni sumi pisariaqartitsineq annerpaava?*
- Kollegiessaaleqineq pillugu ilinniakkaminnik unitsitsiinnartartut qassiuppat?*

Akissut: Apeqqutit akissuteqarfiginissaannut atatillugu kalaallit illui qinnuigisimavakka pisariaqartitsinerup qanoq annertutiginera naliliiffigeqqullugu.

Københavnimi kollegiami inissarsinissaq ajornakusoortupilussuuvuq. "Regensen", Københavnimi kollegiaasoq kalaallinut ilinniartunut marlunnut inissaqartitsivoq. Kollegiali taanna aamma tassatuaavoq kalaallinut ilinniartunut marlunnut inissaqartitsiniarluni aalajangersimasoq. Ilinniartut allat assigalugit kalaallit ilinniartut kollegianut allanut inissarsiortariaqarput.

Arlallit ilinniarfimmi ilinniagaqarnissamut akuerisaasimagaluarlutik piffissaagallartillugu inissamik/kollegiami inissamik pissarsisimanginnertik pissutigalugu Københavnumut ilinniarangitsoortarput. Ilaasa ilinniarnissamut aallartinnissaq qulakkeerniarlugu init akisuut suli attartortarpaat. Oqaatigineqartutut Københavnimi Københavnillu eqqaani

kollegiassarsinissaq ajornakusoortupilussuuvoq, illoqarfimmimi tassani pisariaqartitsineq annerpaavoq.

Odensemi ullumikkut marlunnik ilinniartoqarpoq kollegiani inissaqanngitsunik, Aarhusimi Aalborgimilu kalaallit illuini nalunaarsukkat malillugit kollegiani inissanik amigaateqartoqanngilaq.

Kisitsisit tulliuttut takutippaat ilinniartut ilinniagassatut qinnuteqarfigisimasaminnik aallartitsisimannngitsut, tassa inissaaleqinertik imaluunniit inissaqanngivinnertik pissutigalugu ilinniakkaminnik unitsitsiinnarsimasut pillugit Københavnimi Kalaallit Illuata nalunaarsorsimasai.

Ukioq	Amerlassusaat
2015	5
2016	6
2017	3
2018	Ataasiugallartoq

Illoqarfinni allani kisitsisaatigineqanngilaq ilinniartut qassit kollegiani inissaqannginnertik pissutigalugu ilinniakkaminnik unitsitsiinnartarnerat. Kalaallilli illuini ilisimaneqarpoq ilinniartut ilaat assigiinngitsunik pissuteqartumik ilinniakkaminnik unitsitsiinnartartut imaluunniit ilinniagaqalernissaminnik kinguartsisartut. Pissutaasinnaapput:

- Ilinniartup piareersarluqaarsimannginnera aamma piffissaq kingullerpaaq atorlugu inissaminik pissarserusussimanagera.
- Ilaqutariit amerlasuutigit inissamik qulakkeerlugu pissarsisinnaasannginnerat aamma kollegiani ilaqutariinnut naapertuuttumik inissaqartitsisoqanngingajavinnera. Tassa ilinniartoq aappaminik meeqqaminillu ilaqarluni illoqarfimmut ilinniarfigisassaminukartoq inissarsiortussaavoq, imaluunniit
- Ilinniartumut piffissami sivikitsuinnarmi allamiinneq unammillernarsinnaanera.

Apeqqu 3: Kalaallit DK-mi ilinniartuutitta Kollegiessaannik pilersitsissagaluarutta qanoq akeqassagaluarpa?

Akissut: Aallarniutigalugu oqaatigineqassaaq Danmarkimi kollegialiornissaq pillugu apeqqu UPA2014/30-mut atatillugu Inatsisartuni siusinnerusukkat oqaluuserineqarsimammat, taanna taamanikkut itigartitsissutigineqarpoq. Tassunga atatillugu Sanaartornermut Ataatsimiititaliap ilaatigut oqaatigaa nunatsinni kollegialiortitsinissamut pisariaqartitsineq annertusiartortuartoq aamma pingaarnersiunerimi aningaasat Kalaallit Nunaanni pisariaqartitsiunerpaaffiusumi kollegialiornissamut aningaasaliissuteqaqqinneq sunniuteqarnerpaassasoq. Tassunga ilassutitut ilisimatitsissutigineqassaaq pilersaarutininik taama itturnik piviusunngortitsiniarnermi aningaasaqarnikkut allaffissornikkullu kinguneqaataasinnaasunik naatsorsuisoqarsimannngimmat, soorluttaaq taamaaliortoqassappat pilersaaruisoqqaartoqartariaqartoq.

Ilanngullugu ilisimatitsissutigineqassaaq Københavnimi Kalaallit Illuanni kollegialiortoqarsinnaanera eqqarsaatigineqarsimammat aamma Københavnimi kollegiani inissanik pissarsiniarnissamut aningaasanik immikkoortitsisoqarsimammat.


2014-imut aningaasanut inatsimmi Kalaallit Illuinut tunngatillugu konto pingaernerup ataani ima allassimasoqarpoq: "2014-imiit kontumi pingaarnermi matumani aningaasaliissutit 1,25 mio. kr.-inik qaffaavigineqarput, Københavni Kalaallit Illuanni kalaallit ilinniagaqartut inissaasa pilersinneqarnerinut atatillugu ingerlatsinermut aningaasartuutit amerlinerinut aalajangersimasumik atugassanik. Ilinniartut inaasa amerlanerusunik najugaqarsinnaalernerat attartortitsisarneq tunngavigalugu pilersinneqarput."

Tassa Københavni Kalaallit Illuat Københavni kollegiamik attartornermut ingerlatsinernullu atugassanik 2014-imili 1 mio. kr.-inik pissarsisarsimavoq. Københavni Kalaallit illuat atugassiissutaasut iluini inissanik naapertuuttunik pissarsisinnaasimangilaq. Ukiut ingerlanerini Københavni Kalaallit Illuat kalaallinut ilinniartunut kollegianik Københavnip eqqaani ujartuisarsimagaluarpot. Kollegianik attartortut tamaniittut tamarmik attavigisarlugit iluatsinngitsumilli. Inissiat pisariaqartut naammangillat inissaaleqisoqangaarmat.

Apeqquut 4: Ilinniakkat qassit nunatsinni ilinniarneqarsinnaanngitsut Danmarkimi ilinniarneqartariaqarpat?

Akissut: Ilinnialerusuttunut ilitsersuummi Sunngu-mi (www.sunngu.gl) takuneqarsinnaappot Kalaallit Nunaanni ilinniarneqarsinnaasut takussutissartaat. Inuit ataasiakkaat namminneq toqqagassaraat ilinniartitaanerit taakku Kalaallit Nunaanni imaluunniit Kalaallit Nunaata avataani ilinniassanerlugit. Ilinniarniagaq Kalaallit Nunaanni neqeroorutaanngippat Kalaallit Nunaata avataani ilinniarneqartariaqarpoq.

Inussiarnersumik Inuulluaqqusillunga


Doris J. Jensen